

# აჭარის ავტონომიური რესპუბლიკის უმაღლესი საარჩევნო კომისიის სხდომის

## ო ქ მ ი № 16

04 ოქტომბერი 2008 წელი

ქ. ბათუმი

- სხდომას უძღვებოდა** უმაღლესი საარჩევნო კომისიის თავმჯდომარე არჩილ მიქელაძე.
- სხდომას ესწრებოდნენ** კომისიის წევრები: ქეთევან ჯიქია, თამაზ შარმანაშვილი, თამარ ხოზრევანიძე, გია გარსევანიშვილი, ასლან ჩავლეიშვილი, თენგიზ ცინცილაძე, ლევან გაბრიჩიძე, მამუკა ჯაში, დავით რობაქიძე, ავთანდილ ჩახვაძე, ირაკლი გვარამია და ანზორ ბალათურია.
- მოისმინეს:** სხდომის თავმჯდომარემ სხდომა გახსნილად გამოაცხადა, კომისიის წევრებს წარუდგინა დღის წესრიგის პროექტი და აღნიშნა, რომ წარმოდგენილ დღის წესრიგში შეტანილი უნდა იქნას ცვლილება, ვინაიდან საარჩევნო კანონმდებლობის თანახმად არჩევნებამდე 30 დღით ადრე პოლიტიკურმა გაერთიანებებმა, რომლებმაც საპარლამენტო არჩევნებში პროპორციული წესით ყველაზე მეტი ხმა მიიღო, განცხადებით უნდა მომართონ უსკო-ს - იტოვებენ თუ არა იმავე ნომერს აჭარის უმაღლესი საბჭოს არჩევნებისას. საპარლამენტო არჩევნების შედეგების მიხედვით უსკოში რეგისტრირებული პარტიებიდან ეს უფლება აქვთ „ერთიანი ნაციონალური მოძრაობა“, „ქრისტიან დემოკრატიული მოძრაობა“ და „საქართველოს კონსერვატიული პარტია“. აღნიშნული პოლიტიკური გაერთიანებებიდან უსკოზე განცხადებით ამ დროისათვის (04.10.08 წ 16 სთ) ჯერ კიდევ არ მოუმართავს საქართველოს კონსერვატიულ პარტიას - იტოვებს თუ არა იგივე ნომერს უმაღლესი საბჭოს არჩევნებისას. აქიდან გამომდინარე აუცილებელია შეტანილი იქნას ცვლილება დღის წესრიგში და დღის წესრიგის მესამე საკითხი (საარჩევნო სუბიექტების რიგითი ნომრის განსაზღვრის შესახებ) განხილული იქნას მოგვიანებით 18 საათის შემდეგ. ვინაიდან 18 საათამდე

„საქართველოს კონსერვატიულ პარტია“-ს უფლება აქვს შემოიტანოს განცხადება იგივე ნომრის გამოყენების შესახებ.

**აზრი გამოთქვას:** კომისიის წევრებს დღის წესრიგის ცვლილებით დამტკიცებასთან დაკავშირებით შენიშვნები არ გამოუთქვამთ

სხდომის თავმჯდომარემ კენჭისყრაზე დააყენა წინადადება წარმოდგენილი დღის წესრიგის შენიშვნის გათვალისწინებით დამტკიცების შესახებ.

**კენჭისყრის შედეგი:** მომხრე 13;  
წინააღმდეგი 0;  
(კენჭისყრას ესწრებოდა კომისიის 13 წევრი).

დღის წესრიგი დამტკიცდა შემდეგი სახით:

დ ღ ი ს    წ ე ს რ ი გ ი

**1. განკარგულება**

საოლქო საარჩევნო კომისიის წევრთა შესარჩევი კონკურსის წესის, პირობებისა და ვადების განსაზღვრის შესახებ;

(მომხ. ა. მიქელაძე)

**2. განკარგულება**

საოლქო საარჩევნო კომისიის წევრთა შესარჩევი კონკურსის გამოცხადებისა და სამდივნოს შექმნის შესახებ;

(მომხ. ა. მიქელაძე)

**1. განკარგულება**

საოლქო საარჩევნო კომისიის წევრთა შესარჩევი კონკურსის წესის, პირობებისა და ვადების განსაზღვრის შესახებ.

**მოისმინეს:**

სხდომის თავმჯდომარემ კომისიის წევრებს წარუდგინა საოლქო საარჩევნო კომისიის წევრთა შესარჩევი კონკურსის წესის, პირობებისა და ვადების განსაზღვრის შესახებ განკარგულების პროექტი. მან აღნიშნა, რომ საქართველოს ორგანული კანონის „საქართველოს საარჩევნო კოდექსის“ თანახმად, პოლიტიკურმა

გაერთიანება „საქართველოს რესპუბლიკურმა პარტია“-მ, რომელსაც საარჩევნო კანონმდებლობის თანახმად უფლება ჰქონდა უმაღლესი საბჭოს არჩევნების დანიშნიდან 7 დღის ვადაში დაენიშნა საოლქო საარჩევნო კომისიის წევრები, ეს უფლება არ გამოიყენა. ასევე აღნიშნა, რომ საარჩევნო კანონმდებლობის თანახმად, თუკი პარტია (რომელსაც ეს უფლება მინიჭებული აქვს საქართველოს საარჩევნო კოდექსით) დადგენილ ვადაში არ დანიშნავს საოლქო საარჩევნო კომისიებში თავის წევრებს, უსკო უფლებამოსილია ამ ვადის ამოწურვიდან მომდევნო დღეს საოლქო საარჩევნო კომისია შეავსოს 13 წევრამდე. სხდომის თავმჯდომარემ ასევე განიხილა ყველა ის საკითხი, რაც წარმოდგენილი იყო განკარგულების პროექტში.

**აზრი გამოთქვას:**

კომისიის წევრმა გაა გარსევანიშვილმა. მან აღნიშნა, რომ უმჯობესი იქნებოდა კონკრეტულად იქნას მითითებული საოლქო საარჩევნო კომისიის წევრთა შესარჩევი კონკურსის ჩატარებიდან რა ვადაში ცხადდება კონკურსის შედეგები.

სხდომის თავმჯდომარემ არჩილ მიქელაძემ კენჭისყრაზე დააყენა წინადადება განკარგულების პროექტის შენიშვნის გათვალისწინებით დამტკიცების შესახებ.

**კენჭისყრის შედეგი:** მომხრე 11;  
წინააღმდეგი 1;

(კენჭისყრას მონაწილეობდა კომისიის 12 წევრი).

**მიღებულია განკარგულება:**

„აჭარის ავტონომიური რესპუბლიკის უმაღლესი საბჭოს არჩევნების შესახებ“ აჭარის ავტონომიური რესპუბლიკის კანონის 36-ე მუხლის პირველი, მე-2 და მე-3 პუნქტების და 80-ე მუხლის მე-5 პუნქტის საფუძველზე, უმაღლესი საარჩევნო კომისია **ადგენს:**

**მუხლი 1.**

განისაზღვროს აჭარის ავტონომიური რესპუბლიკის უმაღლესი საბჭოს 2008 წლის 3 ნოემბრის არჩევნებისათვის შექმნილ საოლქო საარჩევნო კომისიის წევრთა თანამდებობაზე ასარჩევ პირთა შერჩევის კონკურსის ჩატარების შემდეგი წესი, პირობები და ვადები:

1. 2008 წლის 3 ნოემბრის აჭარის ავტონომიური რესპუბლიკის არჩევნებისათვის საოლქო საარჩევნო კომისიების 13 წევრამდე შევსების მიზნით 2008 წლის 4 ოქტომბერს უმაღლესი საარჩევნო კომისია აცხადებს საოლქო საარჩევნო კომისიის წევრების შესარჩევ კონკურსს. საკონკურსო დოკუმენტაციის მიღება იწარმოებს უმაღლეს საარჩევნო კომისიის სამდივნოში 2008 წლის 5 ოქტომბრიდან 6 ოქტომბრის ჩათვლით.

2. საოლქო საარჩევნო კომისიის წევრთა კონკურსში მონაწილეობის უფლება აქვს საქართველოს ქმედუნარიან მოქალაქეს 21 წლის ასაკიდან, რომელიც აკმაყოფილებს საქართველოს ორგანული კანონის „საქართველოს საარჩევნო კოდექსი“ 18-ე მუხლის მე-5 პუნქტის, 33-ე მუხლის მე-5 პუნქტისა და „საჯარო სამსახურის შესახებ“ საქართველოს კანონის 17-ე მუხლით დადგენილ მოთხოვნებს;

3. კანდიდატი კონკურსში მონაწილედ ჩაითვლება სამდივნოში საკონკურსო დოკუმენტაციის რეგისტრაციის შემდეგ. არასწორად, არასრულყოფილად ან რეგისტრაციის ვადის გასვლის შემდეგ წარმოდგენილი საკონკურსო დოკუმენტაცია არ განიხილება;

4. საოლქო საარჩევნო კომისიის წევრობის კანდიდატებმა კონკურსში მონაწილეობის მიზნით სამდივნოს უნდა წარუდგინოს შემდეგი საკონკურსო დოკუმენტაცია:

ა) წერილობითი განცხადება უსკოს სახელზე, რომელშიც მითითებული უნდა იყოს:

ა.ა) კანდიდატის სახელი, გვარი, დაბადების თარიღი;

ა.ბ) განათლება;

ა.გ) სპეციალობა;

ა.დ) სამეცნიერო ხარისხი (თუ აქვს);

ა.ე) სამუშაო ადგილი და თანამდებობა (თუ აქვს);

ა.ვ) საარჩევნო ოლქის ნომერი და დასახელება, სადაც მას სურს საოლქო საარჩევნო კომისიის წევრობა;

ა.ზ) მისამართი (საქართველოს მოქალაქის პირადობის (რეგისტრაციის) მოწმობის შესაბამისად);

ა.თ) საკონტაქტო მისამართი და ტელეფონის ნომერი (თუ აქვს);

ბ) განცხადებას ხელს უნდა აწერდეს კანდიდატი და მას უნდა დაერთოს:

ბ.ა) შრომითი ბიოგრაფია და საარჩევნო ადმინისტრაციაში მუშაობის გამოცდილების აღწერა (თუ ასეთი გამოცდილება აქვს);

ბ.ბ) უმაღლესი განათლების დამადასტურებელი საბუთის ასლი;

ბ.გ) ორი ცალი ფერადი ფოტოსურათი ზომით 3X4;

ბ.დ) პირადობის (რეგისტრაციის) მოწმობის ან პასპორტის ასლი;

ბ.ე) საარჩევნო ადმინისტრაციის მოხელის სერტიფიკატის ასლი;

5. დოკუმენტების სრულყოფილად წარმოდგენის შემდეგ კანდიდატი მიიღებს სარეგისტრაციო ნომერს, კანდიდატს უფლება აქვს განცხადება შეიტანოს მხოლოდ ერთ ვაკანტურ თანამდებობაზე. თუ პირმა განცხადება შეიტანა ერთზე მეტ საარჩევნო ოლქში არსებულ ვაკანტურ თანამდებობაზე, ასევე არასწორად, არასრულყოფილად ან რეგისტრაციის ვადის გასვლის შემდეგ წარმოდგენილი საკონკურსო დოკუმენტაცია არ განიხილება;

6. კანდიდატს, რომელიც უსკოს გადაწყვეტილებით მიწვეული იქნება გასაუბრებაზე, თან უნდა ჰქონდეს პირადობის დამადასტურებელი დოკუმენტი, გამოუცხადებლობის შემთხვევაში იგი კონკურსიდან მოიხსნება და მისი კანდიდატურა აღარ განიხილება;

7. კანდიდატს უფლება აქვს გამოითანოს განცხადება ან შეცვალოს განცხადებაში აღნიშნული ვაკანტური თანამდებობა შესაბამისი განცხადებით საბუთების წარდგენის ვადის ამოწურვამდე;

8. უსკო კანდიდატთა დაუსწრებლად წყვეტს ყოველი კანდიდატის შესაბამისობას ვაკანტური თანამდებობის დასაკავებლად დადგენილ მოთხოვნებთან უსკოს გადაწყვეტილება მიიღება ხმათა უმრავლესობით. სხდომაზე დამსწრე კომისიის წევრთა ხმების თანაბრად გაყოფის შემთხვევაში გადამწყვეტად ითვლება თავმჯდომარის ხმა;

9. უსკოს უფლება აქვს საჭიროების შემთხვევაში საკუთარი ინიციატივით მოითხოვოს კანდიდატთან გასაუბრება;

10. უსკო საოლქო საარჩევნო კომისიის წევრებს ირჩევს სახელობითი კენჭისყრით, კონკრეტულ ვაკანტურ თანამდებობაზე საოლქო საარჩევნო კომისიის წევრთა კონკურსში მონაწილე ყველა კანდიდატს კენჭი ეყრებათ ცალ-ცალკე, არჩეულად ჩაითვლება ის კანდიდატი, რომელსაც მხარს დაუჭერს უსკოს სრული შემადგენლობის უმრავლესობა;

11. თუ რომელიმე კანდიდატის მიერ მიღებულ ხმათა თანაბრობის გამო გამარჯვებული ვერ გამოვლინდა, ამ კანდიდატებს დაუყოვნებლივ ეყრებათ კენჭი მათ შორის გამარჯვებულის გამოსავლენად, თუ გამარჯვებული კვლავ ვერ გამოვლინდა, იგი წილისყრით განისაზღვრება;

12. თუ კენჭისყრის შედეგად არ შეივსო ყველა ვაკანსია, დარჩენილ კანდიდატებს კენჭი ხელახლა ეყრებათ;

13. ვაკანტურ თანამდებობაზე არჩევისას უპირატესობა ენიჭება იმ კანდიდატს, რომელსაც გააჩნია საარჩევნო ადმინისტრაციაში მუშაობის მეტი სტაჟი, იმავდროულად ყურადღება მიექცევა კანდიდატის საქმიან თვისებებს და რეპუტაციას;

14. თუ კონკურსის შედეგად ერთ ან მეტ საოლქო საარჩევნო კომისიაში ყველა ვაკანტურ თანამდებობა ვერ შეივსო, ხელახალი კონკურსი გამოცხადდება მხოლოდ დარჩენილ ვაკანსიაზე;

15. უსკოს მიერ ხელახალი კონკურსი ცხადდება კონკურსის შედეგების გამოქვეყნებიდან 1 დღის ვადაში;

16. კონკურსის შედეგები ქვეყნდება უსკოს ვებ-გვერდზე კონკურსის ჩატარებიდან მომდევნო დღეს;

17. ხელახალი კონკურსის პირობები განისაზღვრება ამ განკარგულებით.

**მუხლი 2.** უმაღლესი საარჩევნო კომისია საოლქო საარჩევნო კომისიის წევრებს ირჩევს საკონკურსო დოკუმენტაციის წარდგენის ვადის ამოწურვიდან მომდევნო დღეს.

**მუხლი 3.** ეს განკარგულება შეიძლება გასაჩივრდეს ბათუმის საქალაქო სასამართლოში (მისამართი: ქ. ბათუმი, ზუბალაშვილის ქ. №30) მისი მიღებიდან 1 კალენდარული დღის ვადაში.

**მუხლი 4.** ეს განკარგულება ამოქმედდეს ხელმოწერისთანავე.

## 2. განკარგულება

საოლქო საარჩევნო კომისიის წევრთა შესარჩევი კონკურსის გამოცხადებისა და სამდივნოს შექმნის შესახებ.

### მოისმინეს:

სხდომის თავმჯდომარემ კომისიის წევრებს წარუდგინა საოლქო საარჩევნო კომისიის წევრთა შესარჩევი კონკურსის გამოცხადებისა და სამდივნოს შექმნის შესახებ განკარგულების პროექტი. მან აღნიშნა, რომ საარჩევნო კანონმდებლობით საოლქო საარჩევნო კომისიის წევრის ასარჩევად საკონკურსო პირობებს, ვადებს და წესს განკარგულებით განსაზღვრავს უმაღლესი საარჩევნო კომისია. ასევე აღნიშნა, რომ იქმნება სამდივნო სამი პირის შემადგენლობით, რომელიც საარჩევნო ოლქის წევრობის კანდიდატებისგან მიიღებს კანონით დადგენილ დოკუმენტებს კონკურსში მონაწილეობის მისაღებად სამუშაო დღის 10 სთ-დან 18 სთ-მდე. სხდომის თავმჯდომარემ ასევე განიხილა ყველა ის საკითხი, რაც წარმოდგენილი იყო განკარგულების პროექტში.

### აზრი გამოთქვას:

წარმოდგენილი განკარგულების პროექტი მოწონებული იქნა კომისიის წევრების მიერ.

სხდომის თავმჯდომარემ არჩილ მიქელაძემ კენჭისყრაზე დააყენა წინადადება განკარგულების პროექტის დამტკიცების შესახებ.

### კენჭისყრის შედეგი:

მომხრე 13;  
წინააღმდეგი 0;  
(კენჭისყრას ესწრებოდა კომისიის 13 წევრი).

### მიღებულია განკარგულება:

„აჭარის ავტონომიური რესპუბლიკის უმაღლესი საბჭოს არჩევნების შესახებ“ აჭარის ავტონომიური რესპუბლიკის კანონის 36-ე მუხლის პირველი და მე-3 პუნქტების, 80-ე მუხლის მე-5 პუნქტის და აჭარის ავტონომიური რესპუბლიკის უმაღლესი საარჩევნო კომისიის 2008 წლის 04 ოქტომბრის № 67 განკარგულების საფუძველზე, უმაღლესი საარჩევნო კომისია ადგენს:

**მუხლი 1.** გამოცხადდეს აჭარის ავტონომიური რესპუბლიკის უმაღლესი საბჭოს 2008 წლის 3 ნოემბრის არჩევნებისათვის შექმნილ №79 ბათუმის, №80 ქედის, №81 ქობულეთის, №82 შუახევის, №83 ხელვაჩაურის და №84 ხულოს საოლქო საარჩევნო კომისიის წევრთა შესარჩევი კონკურსი თითოეულ საარჩევნო ოლქში თითო ვაკანტურ თანამდებობაზე.

**მუხლი 2.** საოლქო საარჩევნო კომისიის წევრის არჩევის კონკურსის ჩატარების წესი, პირობები და ვადები განსაზღვრულია აჭარის ავტონომიური რესპუბლიკის უმაღლესი საარჩევნო კომისიის 2008 წლის 04 ოქტომბრის № 67 განკარგულებით.

**მუხლი 3.** კონკურსის ორგანიზებულად ჩატარების მიზნით უმაღლეს საარჩევნო კომისიაში იქმნება სამდივნო შემდეგი შემადგენლობით:

- ა) ნერვისტან ფალავა - სამდივნოს უფროსი;
- ბ) სოფო ვარშალომიძე.

**მუხლი 4.** სამდივნოს ზედამხედველობას გაუწევს უმაღლესი საარჩევნო კომისიის მდივანი ქეთევან ჯიქია.

**მუხლი 5.** საკონკურსო დოკუმენტაცია სამდივნოს წარედგინება 10 სთ-დან - 18 სთ-მდე.

**მუხლი 6.** ეს განკარგულება შეიძლება გასაჩივრდეს ბათუმის საქალაქო სასამართლოში (მისამართი: ქ. ბათუმი, ზუბალაშვილის ქ. №30) მისი გამოქვეყნებიდან 1 კალენდარული დღის ვადაში.

**მუხლი 7.** ეს განკარგულება ამოქმედდეს ხელმოწერისთანავე.

სხდომაზე სხვა საკითხი არ განხილულა

კომისიის თავმჯდომარემ არჩილ მიქელაძემ სხდომა დახურულად გამოაცხადა.

კომისიის თავმჯდომარე

ა. მიქელაძე

კომისიის მდივანი

ქ. ჯიქია